

四庫全書

集部

欽定四庫全書

集部

東江家藏集卷六

詳校官監察御史<sub>臣</sub>龔驥文

中書<sub>臣</sub>劉源溥覆勘

總校官知縣<sub>臣</sub>繆琪

校對官編修<sub>臣</sub>周瓊

謄錄監生<sub>臣</sub>袁文宿

欽定四庫全書

東江家藏集卷五

中集一

明  
顧清  
撰

北游稿

賦五首

文淵閣賦

昔我文皇之統萬方也稽往古遵舊章攬衆維提要綱  
謂六典之分雖倣於周禮而百揆之總實自於虞唐或

合而分或約而詳蓋不可無樞機之總疇咨之良也乃  
眷斯顧禁垣之隅乃崇傑閣翼彼宸居錫文淵之嘉號  
擢鑾坡之碩儒職論思於九重贊元化於中樞雖官曹  
之未彰實名體之隱如此其大略也若乃其地則日華  
之右丹鳳之東重門側啓複磴中通長廊後帶而龍矯  
層城對起而繚虹非密勿之有關蓋不得以闖乎其宮  
其中則有石渠之祕金匱之藏殷周訓誥洙泗典常班  
馬之所敘述賈董之所鋪張奎光壁耀照灼乎虹梁其

前則有玉堦珉碱仰接俯延文杏敷錦碧芸連錢瑤臺  
植和鼎之卉銅池分並蒂之蓮承雨露之先及各獻巧  
而呈妍其為制也邃密高閼沈深肅清黃扉豁其前殿  
白間疎以通明案有朱墨庭無訟爭希夷乎紫宮逍遙  
乎玉京邈風雨之何及時仙韶之遠聆乃有臯夔之輩  
稷禹之倫大冠長劔鳴玉垂紳坐於兩楹敷帝猷而演  
皇墳萬機倚以裁決庶績賴以經綸則有大官供帳天  
府奇珍湛恩渥禮眷我儒紳至於睿思時凝事資訪逮

中貴傳宣東朝賜對日度晷而徐還步金扉而緩退其  
或金根戾止玉輦幸臨略等級於堂陞咨失得於古今  
每先過而陳善亦隨時而獻箴或都而俞或吁而咈言  
皆可書動鮮有慝此則建閣以來累朝之盛節也嗚呼  
漢開金馬賢俊雲蒸唐啓學館士誇登瀛徒取技於雕  
蟲尚無關於大經然猶耀簡策熙鴻名而況地兼乎木  
天之重名並乎鳳池之榮酌元氣以運四時敷王言而  
令庶正宜乎萬事於此理萬化於此成而陶冶乎其中

者又可闕於頌聲也於是拜手稽首敷陳其槩而系之以歌歌曰五雲葱蘢黃閣崇兮東壁流照光燁空兮維帝伊佐志決道同兮政於此成民物豐兮有隆自今垂之無窮兮

迎薰所賦

迎薰所者錫山鄒顯之燕息之室也縉紳之題詠富矣錢君世恩要予賦予以其未至也辭不可乃想象髣髴寫君之意而述以歸之其詞曰

穆清微其有無兮披拂乎予之兩楹薄筠簾以迴轉兮  
汎蕙帷之輕明塊予處此一室兮逝將息乎逢迎蹶披  
襟而曳履兮若美人之在庭昔予厭彼濁世兮獨冥搜  
於千古聞重華之盛明兮嗣放勲而馭宇地以平天以  
成兮被龍山而容與維茲風之適來兮會千載之一時  
皇情穆以有感兮撫朱弦而寫之時以阜財薰以解慍  
兮至今盈耳而希夷予生不及帝之時兮徒髣髴於宵  
寐今日不知何日兮恍神交而心會固人生之倏忽兮



哀時命之不齊天與人其代勝兮恒寡安而多危鳴條  
既不可以長兮矧東周其下移七王之雲擾兮劉項爭  
雄南北之腥羶兮唐五季之昏蒙彼固見青天皎日其  
幾何兮又何暇弄月與吟風蹇予抱此陋質兮羌獨當  
此辰也賢與聖其兩逢兮予獨為此民也萬物之長茂  
兮朱明在行地上躋而天下降兮蘊隆熾而煬蒸鼓乾  
坤以為爐兮仰赫曦之明明方永日之不可暮兮忽纒  
纒其自南襲單絺以流沫兮孰使予食美而寢甘予壹

不知其所如今忽吾造於姚姁精穆穆以交驚兮若鸞  
鳳之先台窺玉衡以左轉兮卿雲縵其陸離拜紵衣於  
當宁兮日與月其交輝襲芳飲淳兮樂不可以極也撫  
心闢志兮胖吾體之適也吾既忘吾形之遠邇兮風亦  
不測其何之仰銀潢之耿耿兮步徙倚於庭墀劃撫楹  
而長嘯振庭柯之微微重曰薰風兮南來經吾堂兮歷  
吾階予散髮兮前榮若將進兮復回玲瓏兮八窓為君  
兮洞開唐虞世遠兮不可以追嚴霜刻骨兮烈日燎肌

幸與子兮無遠終吾生以徘徊

弔蔣文輝賦

弘治丙辰華亭蔣先生文輝以太學生集判入京師  
絕淮而上遇暴風沒於清河予鼓篋類黌及文輝游  
知其人卓乎斷然不應其罹此也戊午二月其從孫  
鼎自京師南歸予哀君積學苦志而不以考終恐其  
遂離釋渙散而無所歸也為作楚詞一通授鼎使投  
諸河以弔之其詞曰

吁嗟先生吾誠不知天之道兮果蒙昧而杳冥賢秉節而逆遭兮器肆行而顯榮貞夫槁死窮谷兮饕餮讒嫉姱以充庭顏箠瓢而天閼兮柳跖者以縱橫滄玉石以俱燬兮擘蕭蕙而同刈鸞宛頸以折翼兮梟天矯以橫厲繫昔人之憾此兮吾常謂其不信獨憤世而長往兮懲一噎而毀殄杲白日之昭昭兮謂斯言其有常孰洪流之奔猛兮而以代子黃腸彭咸之畢命兮遭時之不祥零江之滅胥兮惟賄見而忘生吁嗟先生獨何為兮

而淪胥以傾飭躬砥行兮逝將邁於昔賢遭時盛明兮  
被章甫以周旋指紅雲而上征兮披五色之玫瑰歲既  
晏予疾驅兮亦既亂於清淮皓層冰之嶷嶷兮忽舟舞  
而挽掀風號呼以殷怒兮竟渾瀕以淪淵稽素履而考  
厥祥兮一不知其招也將天人之殊軌兮日與月其昭  
昭也誠縱恣而弗主兮吾何以終此朝也滔滔汴泗兮  
晝夜東馳奔流赴海兮不見其涯吁嗟先生兮誰適焉  
歸魚龍眩幻兮百恠谿訝長蛟千仞兮掉尾磨牙以殺

為嬉兮以凶為嘉秩川靈而莫祠兮固將以為民禦禬  
青猿於幽址兮昔人夫豈無故靡玉帛其無讓兮視顛  
沛其猶固然委成數於莫改兮又孰與懲頑而牖賢慙  
吾懷之莫寫兮詞既訖而重陳忠與佞其同凶兮驅一  
世而橫奔洵予志之匪惑兮固絲亂而塵氛苟初志之  
靡定兮不改轍而迴輪重曰洪流浩瀚兮汨淵淪幽暗  
弛弱兮漭無神吁嗟先生兮此湛身裏餒餒兮香苾芬  
投畀中流兮悲忍云巫陽上天兮誰與詢歌以訊陽侯

兮哀我人

東山賦

太湖有東山焉少詹學士守谿先生之尊君既致政  
歸老其間天子推恩歷封至左春坊左諭德今年壽  
八十矣七月十一日實惟初度之辰及先生門者皆  
預為詩歌以獻清壬子先生所造士也曩昔道吳門  
躋公行竊思拜於下風而不得但遙望丹崖綠壑於  
洞庭煙靄間杳然如隔世外乃今幸得以言語附諸

生後將與吳歆越唱並進於公前其何幸加焉於是  
敬即公所居東山而賦之雖詞義萎弱聊以宣寄嚮  
往備衆作之一云爾其詞曰

客有厭塵區之側隘慕松喬之所廬思御風而乘氣超  
六合而嬉娛乃命奇肱挾飛車凌閭闔登天衢經崑崙  
歷嵩華憩泰岱而一息窮遐眺於東吳溯匹練之餘輝  
指滴翠於煙蕪時乃恍若形邁穆爾神渝乃援馭者而  
告之曰吾聞夫揚有巨浸是名具區中有靈山東西列



居三洞五門九便七塗潛通五嶽苞絡坤輿今茲所覩  
是邪非歟爾有覩於彼者乎於是馭者極目而睨之曰  
嘻有是哉此夫隱隱崇崇處窪而隆旁無附麗兀若乘  
空者乎鬱鬱葱葱或青而紅中涌金銀結為崇墉若有  
真仙隱約其中者乎乍陽而陰倏晦而明靈恠翕忽不  
可殫名積氣冥蒙兮覆其上浮光滉漾兮搖其垠剽兮  
矯兮若鸞鳳之翳日灼兮爍兮若瑤草之敷春其舒也  
若霧其停也若雲窮目所未覩極耳所未聞先生有意

於茲行乎願振策而驅輪於時東山主人方以揆度之  
辰啓金堂闢林屋發雲笈檢瑤籙呼遠游與赤松歌南  
山以相屬聞客行之遠來起相視而頓足乃卷瑤席徙  
金鍾登駕浮挹垂虹前隱浮玉後憑穹窿俯擘神芝仰  
蔭喬松翫龍魚於金沙瞰舞石於幽宮石鵝管以垂乳  
泉醍醐而沁空金窻豁其四啓玉戶竅以旁通已而綸  
素絲掄文竿則盈尺之玉登於盤翳芳林振瑤柯則徑  
寸之珠隕於山然後牽紫絲於波底落火齊於巖端溪

芼錯以並列陸寶燦以相鮮乃有王韓劉張葉周暨唐  
月質星標雲冠霧裳左掖右擁贊我壺觴客乃茫然自  
失憮然遐想曰主人其有道者哉主人未對而傍有笑  
者曰嘻客以主人為有異於人乎主人之少也蓋嘗耕  
六籍漁百家含道真咀文華舒英翹於簡牘粲雲月而  
朝霞其壯也又嘗觀國光列賢科撫雷封之百里覃文  
化於絃歌既乃時與道乖俗與政訛人我是迂我得實  
多於是褫銀章於五斗歸長嘯於煙蘿若夫文章命世

道術經邦則承構之有人焉芝蘭再秀瑜珥重輝則繼德之有孫焉一命而登太史再命而列宮賓輝煌乎九重之詔璀璨乎五雲之文則帝命之日新焉蓋隱而不失義顯而能裊身夫是以賁茲山於千古掩圖藉於無前也豈與夫沮溺之徒絕人羣而遺世嘯嚕之子決性命而徇人者哉客乃起而謝曰夫行有所極美有所鍾名不外至樂本在中微君言吾幾浪迹於汗漫之鄉乃相與歌曰山之高兮如雲湧洪淵兮承厚坤靡虧崩兮

維千春山出雲兮雨四方蘇萬物兮躋時康民鼓舞兮  
歌后皇山中之人兮壽而臧對雲山兮樂無央吁嗟往  
昔兮徒相望東華兮塵土蓬萊兮渺茫宛洞庭兮東渚  
早歸來兮從公游以徜徉

弔董貞女賦

貞女故都督僉事河間董公興之女許嫁故都御史  
寇公深次子某未行而某死求往弔不許遂不食越  
十日亦死後三十年予從其兄同知君琇得其事乃

賦以弔之其辭曰

絕命兮委身登高樓兮閨其無人撫明鏡兮太息橫流  
涕兮霑巾嗟人生兮實難耿予心兮竟誰陳思夫君兮  
未識隔泉臺兮路漫漫以誰極仰青天兮萬里羨黃鵠  
兮交翼黃鵠交飛兮翼蹕蹕誰其送我兮君之傍濯鉛  
華兮解明璫孰為羅綺兮孰為膏粱矢一心兮黃壤儼  
六轡兮康莊桂有種兮蘭有根芳香蘊結兮何千百年  
董之室兮冠之門誰其積兮鍾爾賢柏舟之靡忒兮其

猶共鬻庶髣髴兮齊布衣之讎燕賢有過而愚弗逮兮  
吾寧謂其踰之漉狂瀾之東驚兮寧激以隨重曰已矣  
俗其淪兮吾不知其所窮委身十君更四姓兮世猶以  
保民而書庸我哀斯人殞於璞兮而或以非中歌以唁  
之兮千秋萬歲罹百毀而靡從

辭十九首

陸孝子刲股辭

兒有身兮母之遺母疾之殆兮兒生何為身死母可代

兮兒甘如飴殘吾身兮寸肌免吾親兮跼危孝哉陸生  
兮人子之儀吁嗟生兮當此時目見母兮身不為兒兒  
肌斷兮母不知母命以續兮肌復滋嗟生之孝兮於古  
稀彼鄴之對兮理固宜情迫於中兮擬議安施仁有殺  
身而成兮身今在茲毀以易親死兮又何惜夫此而嗟  
生之孝兮今誰繼之持以奉吾君兮千秋萬歲其無虧

朱孺人哀辭

有美人兮山之中潛玄室兮翳貞松明鏡掩兮虛夜月



塵機斷兮悲秋風思夫君兮往日諧琴瑟兮商宮懷德  
音兮意難窮悵泉臺兮路幾重良人慟兮惋切嗟別路  
兮音塵絕升空堂兮遲遲儼履綦兮成列惟勤勞兮未  
償懷貞淑兮心苑結涼風動兮中閨紛絳繚兮羅幃知  
百年兮終盡羌觸物兮增悲託文詞兮發潛輝有知無  
知兮慰爾思

辰慶堂辭為趙叔鳴賦

翁生之歲兮龍麗天門龍周于天兮挾公子以凌雲

翁

辰生叔鳴以  
丙辰登第

翁壽而燕兮捷書在閤翁舉觴兮酌蒼旻

紛重拜兮羅衆賓慨人生兮不齊哀天賤兮紛紛孰吉  
昌兮參會將厚德兮通神淮之南兮江之潯柳藏其門  
兮花映其廡翁作堂兮承帝之嘏翁燕而喜兮式歌且  
舞堂之構兮嶙峋鞏厥址兮惟千春我作歌兮告爾後  
昆爾燕而聚兮無忘爾世勲

東山辭

戊午十一月初十日清  
寧宮災明日先生行

歲崢嶸兮白日馳朔風晨起兮霜鴈飛長河千里兮愁

欲斷公何為兮忽言歸挽公兮屢撫悵別公兮見何時  
渺渺兮寒江心睠睠兮欲安施惟人生兮悅賢孰憎愛  
兮予私抗予章兮天閭指肝膈兮數陳忱懇切兮臣志  
沛汪濊兮天之思忽東山兮回首渺白雲兮孤村別來  
兮幾時叢桂枝兮輪囷顧幅巾兮猶昔莞一笑兮忘言  
公將行兮裋裏儼東路兮驂駢忽回瞻兮天闕思承恩  
兮赤墀惟人生兮不常嗟終始兮多違不竟兮公施以  
張兮世維熊蹯兮魴鯉審吾擇兮奚疑荆之山兮湘之

江我思公兮道阻且長總羸馬兮東路忽西崦兮斜陽  
蘭谷辭為黃時雍尊人賦

蘭之生兮於彼空谷抱幽貞兮不羣以獨白石兮清泉  
紛紫莖兮冒寒淥蘭之香兮揚揚汎光風兮朝陽谷無  
人兮自芳谷有人兮吾與子兮徜徉谷中之人兮清且  
真不可見兮徒名聞仰丹崖兮千仞思委佩兮江濱折  
芳兮誰贈羌雲路兮愁人撫瑤琴兮歎息長寄情兮斯  
文

石淙辭

山之石兮孱顏飛淙交兮石之間龍躍兮虎鬬砰雷擊  
兮雲翻尋源兮何處望極浦兮揚瀾碧之雞兮金之馬  
點蒼紛兮高下衆壑兮爭流指滄溟兮一瀉舟萬斛兮  
鴻毛羣龍乘之兮以變化繫山川之偉絕兮宜夫子之  
挺生起一邦而天下兮亦足稱其神靈京江既已改築  
兮猶睠睠乎茲土潁峨嵋吳蜀山兮孰云今之非古石  
弗泐兮淙弗枯散為江海蒸為霖雨兮潤八區吾誠不

測夫子之妙用兮固將等廊廟於江湖渺南雲兮萬里  
長寄興兮桑弧

樂間園為同年夏如山賦

仁高峯

天之德兮曰仁山得之兮鎮厚坤既雄秀兮又以尊撫  
衆壑兮如兒孫千花兮萬卉吾與爾兮長春

仙游洞

羣仙游兮大羅時憩息兮岩之阿玉柱兮金窻俯洞庭

兮煙波忽中宵兮月上聽泠泠之空歌

漫興亭

漫吾出兮周星忽歸來兮亭以成嗟平生兮萬事亦何  
擇兮何營偶欣然兮終日孰久近兮千齡

獨憩臺

思美人兮不來步石徑兮生青苔聊升高兮騁望攬桂  
枝兮徘徊晴天兮萬里見一鶴兮飛回

惠脈清流

泉何為兮此流湛清泠兮巖之陬洗京洛兮緇塵翫濠  
梁兮浮條渺真源兮何處望龍山兮落日幽幽

澗灣略約

路轉兮山迴望幽巖兮阻深隈忽凌空兮飛步振予策  
兮丹臺願鐫崖兮有紀步靈蹤兮天台

天香屏

結湘筠兮玲瓏交桂枝兮隱隱叢叢玉葉兮金英來清  
芬兮遠風將書香兮此類嗣雲仍兮無窮



歲寒徑

竹栢兮成林中一徑兮靜以深謝紅紫兮春陽飽風霜  
兮重陰懷佳人兮悵望將千載兮同心

爛柯枰

山中人兮不歸樵柯爛兮閭里全非嗟人生兮幾何奄  
夕曛兮朝暉神仙兮戲予拂蒼珉兮渺遐思

觀魚處

圉圉兮洋洋忽吾止兮濠之梁綠藻兮青蘋與爾游兮

兩忘

虛白書舍

室無塵兮更明晏獨處兮憺以清左瞻兮右仰諸史兮  
羣經聊逍遙兮永日孰寵利兮榮名

迴碧山房

隱吾屋兮山之東仰仁高兮一徑潛通有芭蕉兮夏綠  
更芙蓉兮晚紅忽夕陽兮雲合倚闌干兮意萬重

畫水辭庚辰六月禮部南齋作

羣山兮東傾百川兮與俱崑崙兮萬里渺東極兮歸墟  
龍門兮三峽屹崢嶸兮噴鞮鞬莫九服兮常寧疏萬派  
兮終合展瑤籤兮拂霜藤目窈窕兮耳泠泠江南兮春  
盡靡蕪綠兮楓青思美人兮何處撫朱絃兮空復情

東江家藏集卷五

欽定四庫全書

東江家藏集卷六

中集二

明 顧清 撰

北游稿

詩七十九首

題畫梅

癸丑李鴻臚東齋作

四百峯頭霜氣橫  
玉尊零落翠禽聲  
寒綃三尺對虛牖  
髣髴松林殘月明

江南見梅只是梅燕山見畫殊依依西垣夜半草堂夢  
青子綠陰雛燕飛

送使山東

春雲拖影拂輶車南出都門候吏趨兩歲青齊仍苦旱  
帶將甘雨洗焦枯

和聽鶴亭聯句韻送毛太史維之歸省

夜聞東壁餞文星曉起西堂乍酒醒

時與謙見招以  
他會不及赴

未

許餘光分未坐空吟佳句入無形歌停渭柳仍翻調舞

愛臯禽擬著經更與玉堂添故事未應寥落歎槐廳

午日昭應宮送陳深淵得獸字

危絃激清湍奇香裊金獸佳辰良友集高宴啓清晝維  
時值昇平四郊息烽堠縉紳多暇日邀賞遺俗舊況茲  
金玉人聲價儒林右十年期破的一矢尚虛穀於焉送  
將歸不飲復何有薰風晚更起疊嶂遠仍秀遐觀窮八  
紘醉舞翻兩袖區區蠻觸爭瑣細安足究尚懷禹稷心  
未忍蒼生瘦往者勿復云來日知未後三年家政成洗

耳明光奏

送同年周時敏歸安陸

男兒意氣凌四方結髮萬里期翱翔槐黃催赴觀國光  
手攜尺書朝帝王帝曰汝賢留我傍往視予宰銓才良  
紅簾粉署夏日長裁冕吁咈談虞唐白雲飛來經太行  
翩然歸思不可當帝恩曠蕩真無疆汝整釋事歸故鄉  
都門朝日天氣涼束裝出祖驅驕驪關吏舊識趨路將  
舉鞭揮手振紫韁眼中已見荆山蒼男兒名成拜高堂



人間此樂殊未央九重待補龍山章

送秦國聲歸省

天上秋光近人間樂事并華軒  
啓澄霽高宴接恩榮鶴  
壽元無算鵬飛始發程  
雲霄遂歸志閭里溢歡聲  
娟娟風生坐娟娟月傍楹  
酒來吳市美茶淪惠泉清  
瓜果紛前饌詩篇罰後成  
有階堪報國隨寓足陶情  
綠竹宜鐫字丹臺早注名  
他年佐觴豆應及海波平

送朱良翊

翩然聚首忽言歸立遣奚童趣賦詩千里畏途當赤日  
時五月十四日大熱十分清興寄烏絲賈生世共知才大李廣人  
猶恨數奇懸榻故人專有待飛騰應不後明時

送周兵馬之金陵

上海人儀賓用世之父

將軍寶劍雙龍鱗錦衣紅蹙繡麒麟甲第東華接諸貴  
樓船南國隘通津干戈萬里風塵靜兩都冠蓋如雲盛  
朝出長干訪原涉暮入烏衣過劇孟書生昔未試吳鉤  
悲歌三入鳳臺游醉拔霜毫贈君別三山落日不勝愁

送盛斯徵歸娶

柳色衣裳玉色鞭  
看花歸去又逢仙  
黑頭事業須君做  
洞府星橋別是天

夜雨

薊北雨連曉  
江南定若何  
還應碧牕裏  
燈影暗銀荷

秋夜歎

有傳家君病者望家書不至時在桃園堂作

銀河流光濕垂地  
高梧滴露濃如洗  
城頭擊柝城下杵  
幽人已臥中夜起  
東院西院無人聲  
星下草間蛩對鳴

一星起來對吳分恨不從之覓鄉信諸君走馬長安陌  
肯信中宵此中立

新秋即事

月課下二首同

暮雨殘暑盡官居清可挹疏櫳捲秋幔流盼佇危級溫  
涼四時異心會各有入鴉啼煙樹寒露下銀牀濕撫景  
懷昔賢茲地幾翔集新涼信可愛雨霰行且及願言惜  
芳時功業期早立

擬中元謁陵

玉座秋風動紫宸  
寢園時祀救親臣  
雲屯松梓衣冠集  
月照庭楹俎豆陳  
天地有靈鍾王氣  
山陵終古享精禋  
詞臣欲獻甘泉賦  
指日皇輿駕翠麟

登第後寄所知

春風逐伴上金臺  
便著青衫未得回  
夜聽玉龍官燭冷  
曉趨丹鳳御香來  
匡時未展江湖志  
飽食頻驚歲月催  
翹首碧雲南國路  
美人誰在讀書堆

送劉文瑞

時自永康侯西塾告歸

青袍白馬日紛紛何處秋光忽送君  
天地百年同逆旅風塵此地獨離羣  
時平宰相精求士朝暇將軍總好文  
去去江湖莫淹久有人虛席仰多聞

奉餞定菴張先生之南臺

四歷雄藩秉憲旄  
荐更三府肅銓曹  
文章舊是南金重  
風節遙凌北斗高  
興論只今推宋璟  
空羣他日想方臯  
兩京均逸天心在  
莫向霜臺夢午橋

夜坐

仙都閼靈境假日休官程高齋坐來久夜景湛虛明起  
步視天宇曠然遺世纓素心適有會幽興頓此生滄波  
望不極落月金盆傾

遙遙天漢津耿耿橫太清招搖運珠斗時節忽已更感  
此念昨日淒然思友生羣聚不知樂已別始牽情人事  
與日長後期焉可憑

明妃和汪抑之

漢朝翁主半家人臨到王嫱國論新解道懷戎尚忠信

廟堂誰謂少謀臣

宣王六月駕戎車武帝旌旗萬里賒獨以一身寧四海  
明妃何恨泣琵琶

楊妃

漢家妃子度金微裂面西風損黛眉教得後來人解事  
只從金屋撫番兒

題畫送胡友松

畫裏看山惜別離松間立馬醉題詩伏波老去心猶壯



太白狂來酒不辭  
雲日九重丹鳳闕  
風烟千頃白鷗陂  
歸舟正及鱸魚信  
應對西風有所思

記蝎

蟲之毒者南方之即且北方之蝎即且能飛見人輒疾走而蝎行甚緩聞人聲反止不動故多為人得七月廿三夜聞牕間爬沙聲火燭之踞而翹尾卓然可畏乃知其不動者蓋將以有為也即且猶知畏人而蝎止以伺之其甚矣然卒以自斃悲夫故記之以為

戒

讀書心二三耳聞牕蝎走捲紙濡餘膏火起蝎在牖抑  
首伏不行翹尾若有候人言蝎易得此意殊未究懷毒  
乃忘身禍起遂莫救柳州憐蝮蛇釋械低予首因詩戒  
宵人陰賊恒反受

海屋添籌

滄海塵飛是幾秋北堂花甲數方周試尋孝子無窮意  
盡下僊人未了籌紅日傍簷晴可愛綠萱當砌足忘憂

只應盡醉長春酒同送飈輪過弱流

秋夜讀書

閣試

高秋淨炎暑官居若蓬瀛落日人吏散琴書有餘清燭  
至童子去撫卷臨前楹仰窺義皇祕俯探周孔情下上  
千萬年歷歷指掌明自從大道喪聖哲希復生幸此未  
墜地庶以開吾懣稍稍庭葉下淒淒草蟲鳴初月上東  
垣露草光晶熒清景與心會宵眠竟無成微吟倚青瑣  
天風起松聲

初預丁祭

月課下同

北闕初鳴珮東膠肅展儀  
感深思壞木喜極預承齋  
江漢神如在山龍服儼垂  
自今期秉德無愧駿奔時

玉堂對月

萬古此明月流看屬吾人  
人生見月時歡寡愁日頻  
睽茲玉堂署清切近帝宸  
金鋪啓澄霽光景何鮮新  
古人去日多後來浩無垠  
而我於其間渺然凝心神  
不有通夕翫奈彼風雪辰  
茫茫太無中置此冰玉輪  
熒光載靈

魄終古如環循聞有丹桂樹婆娑映天津復有乘鸞女  
煉藥司大鈞願從乞刀圭駐此塵土身青冥無終極悵  
望徒逡巡人生會有役玩物喪乃真掩扉送餘輝朝車  
已鞦韆

送陳邦直赴西安

千古關中郡山川號上游俗餘周日化地重禹書州別  
駕聊伸驥長才類解牛詞林有遺派嘉績會先收

送何溥之西川

西望蜀川千萬山美人蓮幕暫棲鸞雲連劔閣春前度  
天近青城雪後看今日籌邊宜得士古來行道不論官  
務閒好課戎郎學拭目秋風振彩翰

其子宗俊  
從予學

沂州谷生嘗從張友山學能詩善醫工畫梅家  
有園亭之勝比自京師還同館陳君德卿作  
雲山別意詩以贈邀予同賦

亭亭空外雲藹藹雲中山雲山蒼茫自今古江湖游人  
時往還黃金臺前楊柳枯奚奴青絲提玉壺挽君征驂

酌君酒握手目送飛鴻孤花光三昧傳者少山翁老去  
誰同調一命常懷拯溺心十全每奏回生效長安車馬  
日逢迎五侯七貴皆知名拂衣東去不返顧何異黃鵠  
摩空征舞雩壇前春信早園亭盡說君家好肩輿何日  
徑敲門坐詠雲山藉芳草

次韻答張拱辰

張籍經年病臥家紛紛九陌自繁華春風為遣江南信  
拂殺龍泉舊劒花

中朝文獻幾名家每見殷勤訪國華儘有聲名動京邑  
未應消瘦學梅花

奉餞圭峯董先生之南京

秩宗分務簡元僚學士聲華重本朝輟講暫違東殿直  
移家初聽下江潮西風燕市柳條短春日金陵物色饒  
莫倚官閒疎獻納左垣踪跡未全遙

東洋

東南百川會入海不復返茫洋天地間今古無潦旱吾



觀玄化初一氣亦微婉剛柔相蕩摩積潤成浸灌天地  
且有窮海波寧無岸常思凌天行會應得奇觀王生東  
海居茲興知不淺遲予駕飈輪攜爾出汗漫

同年胡鎮之挽詩

天道由來遠人生定可疑如君便長已造物竟何為旅  
殯僧房啓科名墓石垂九原風雨夕腸斷脊令詩

鎮之館女

兄王氏其  
死可閔

送薛平甫

歲暮行旅稀官河斷舟楫朔風吹孤裘征旆向空揭念  
我同鄉彥孤懷耿冰雪南宮既聯鑣北門亦並轍清詞  
與妙句脫口人競說方需麗澤資胡爾當遠別男兒四  
方志豈不在京闕顧彼西山景幽衷日千結一行遂素  
心萬里若踰關因君感予懷攬轡劇中執行塵望欲盡  
歸意更騷屑

送吳南仲

去年放舟過垂虹霜露盡降湖波空三高祠下拂蒼石

長嘯宇內生雄風此時聞君未相識指點煙蕪問君宅  
今年君歸我留此却望江南動顏色君才自是當世資  
暫蹶霜蹄何必疑名場聲價藹然在故園山水聊棲遲  
春洲二月芳杜長蘆芽抽碧河豚上短檝輕舠不用帆  
北里南村恣來往東家鄭郎交最投新年聞亦理歸舟  
詩筭酒榼百里近慎勿流連負壯游

晚歸即事

城頭官柳綠交加日日斜陽集乳鴉湖海書生羸馬背

春來通算九移家

盧布政挽詩

早折宮花上玉墀郎曹五轉冠藩維西銓藻鑑冰霜在  
南國威名草木知洛社幾年初入會昂精前夜忽騎箕  
薤歌不盡思賢意落日長江起碧漪

甲寅正月七日迎駕

紫壇成禮當人日玉珮迎鑾望合宮輦路暗塵清積雪

駕出前一日雪舊

歲臘朔視牲亦然

御旗晴影動春風祥禎協應知天意

對越勤勞仰聖躬湖海書生瞻盛典恥將文筆賦河東

初預慶成燕敬賦

月課

半生湖海夢鈞天此日雲霄奉御筵虞典孟郊神並享  
鎬京春燕禮無前黃分內醞驚殊寵紅戴宮花憶去年  
無限感恩圖報意未論文賦美甘泉

柯學士先生所種二栢樹歌

月課

君不見劉保齋柯竹巖一時名聲齊斗南文鵷孔翠亦  
霄上遺迹世人爭竦瞻玉堂之南雙翠栢傳是竹巖先

生手所植我來撫玩不忍去樹底猶疑有行跡憶初種  
來今幾年高標已見摩雲天雨淋日炙長苔蘚虬鬚龍  
甲皆蒼然斜陽獨立雙樹陰寒天老氣轉蕭森丈夫有  
作期百世此物豈異甘棠林我歌雙栢篇繼彼角弓吟  
古人已恨材難用何處悠悠語此心

送許啓衷

榕陰垂綠荔支丹五月南州畫裏看憶別況逢新歲後  
賜歸猶及未春殘堂高海日明衣錦路入鄉山信馬鞍

還憶西垣鐙火夜重來不遺舊盟寒

又二絕句

一自看花入禁垣清秋憔悴卧春殘金莖不是君王惜  
自憶家山荔子丹

聖代仁深遠俗安側生無復上雕鞍閒居續得君謨譜  
聊為南風一寄看

送周都尉告祀孝陵

明明我聖祖承天馭華夷赫怒定海宇憂勤固皇基典

則遺子孫萬世如一時恭惟衣冠藏鬱鬱鎮地維雲車  
與風馬日夕恒來思神靈居帝傍監觀靡有遺日聞寢  
園中風雨嘗紛披松栢帝所念行列恐有歌玉帛命專  
使潔齋代親祠周侯戚畹英寅清帝心知況此共欣戚  
寧為跋涉辭都亭三月初春光照軒帷祖席列羣彥載  
詠皇華詩戔戔紫金山宮闕何崔嵬侍衛固有職汎掃  
宜如儀聖情切注想歸矣無需遲

石田野色



茅屋青林映短籬  
渺然西崦望東菑  
白羊不起麥平隴  
黃犢閒眠水滿陂  
遠樹每於晨霧失  
短筇尤共晚晴宜  
南陽未為蒼生起  
風雨還聞長紫芝

畢府丞父母同壽

高槐蔭庭風日清  
花羅剪春香霧輕  
金屏翠帷尊兩楹  
門前車馬來傾城  
美人一雙彈玉箏  
雙歌南飛獻長生  
鳳雛銜書儀帝廷  
紫鸞詔書天與榮  
瑤環涓秀瑜珥晶  
書香三世連科名  
膝前拜舞綵衣明  
人間此樂豈易并

願吹濟水添瑤觥靈椿不凋萱不零年年珠履花間迎  
戲效荆公作四首

城東野意動名園滋華芳弱柳黃晚晚天桃映新陽循  
原涉淺渚連步陟崇岡興至陳尊俎憑高顧江鄉生世  
間逸少懷歸念王章東游昨夜夢川谷永相忘

高柳駢密蔭疎篁延清風留客廣廈寬沈李冰壺空梁  
石介清池綠波緣芙蓉日轉禽語樂幽林回短筇逍遙  
崇臺上興入江南峯

長林過朝雨高堂生微涼簾幕含霽景臨軒送清觴  
遙岑參差碧遠浦明夕陽渚宮遂寂寞登樓望川梁  
何當溯流輝汀洲采蘭香

早寒信已嚴頗得羔裘重起開西樓鑰坐愁長河凍  
陽和遜重陰飛雪積危棟紅爐照鄰壁藍尾生憐送吳江  
萬里天媚景春如夢

東拙為舜和太史祖賦

君不見漢陰叟抱瓮終朝不濡畝又不見愚溪翁瓊琚

玉珮分天工拙人勞力泰宇定巧智終以裁其躬東城  
徐翁閱世久寧為漢陰不為柳鴈鳩無能鵲巢坐莊樸  
散木偏多壽才不用全其真功無成貽後昆頽然八十  
餘無懷葛天民古云大巧外若拙吁嗟翁乎豈其人我  
本拙者於時罕通為翁作歌仰翁高風丹崖青壁不可  
以力致幅巾杖履想見城之東天子方好古蒲車起申

公

送人赴番易丞

陳子饒陽去掄才可是宜能無愧職事應不計班資  
宦況湖頭月行裝馬上詩前途猶未晚努力向明時

望雲

青天多白雲游子嗟別親白雲飛揚隨處見極目親舍  
徒傷神徒傷神情何極一回仰天一霑臆春風綠酒金  
臺前恨不隨雲墮親側雲可望不可攀但願親壽如南  
山又如長江東注之波瀾富貴有時來難駐惟朱顏親  
年無恙百事閒勸雲一卮祝雲南飛向我高堂前蔭我

椿樹萱花枝無使秋霜容易凋華滋游子西風江上歸

送徐都閫歸宜興

謙齋閣老子也

五色春衫拂地垂東門高宴駐旌麾舊來仲郢人知少  
欲去玄成馬上遲紅葉巧當官路墜白雲長傍禁垣移  
鯉庭桃李春陰在却愧楊生後賦詩

送王參政慶賀還河南

流電光中玉珮趨鴻臚當仗贊嵩呼瞻天舊識威顏近  
分陝新兼體貌殊北闕朝辭雲擁陛東門秋餞士傾都

雄藩尚有宣房慮何日玄圭協禹謨

時張秋未塞

讀書有感

閨試

良宵可虛擲明鐙了殘書開卷對古人已隔千載餘精  
神方尺間恍若傾蓋初共惟德業光照耀流中區藐予  
嗣前緒十年事菑畲惜哉無良耜終畝多薪樗幸逢明  
聖朝挾冊隨冠裾紛紛雜纂組瑣瑣雕蟲魚白日無畱  
光西飛若飈車涼風振高樹落葉滿庭除念此不能寐  
攝衣起躊躇盛年無再至駕駕不可虛

送屠都憲元勛巡撫薊州等處兼督邊關

玉節朝辭出鳳樓，朱旗遙映塞垣秋。  
寧邊舊屬西臺重，當宁今無北顧憂。  
鈴閣春風閒衛戟，海山晴日動輕裘。  
極知根本須才傑，未為還朝是黑頭。

周世貞父六十

世貞名忠嘉定人生於金齒雲南己酉解元

海山金桃幾年熟，天台靈源流水速。  
仙翁六十自世間，老圃西風終日閒。  
鳳雛銜書赤霄上，五彩朝陽爛相向。  
雲中有路不可歸，春酒盈尊獨惆悵。  
瓢筌四管寸膾魚。



咀羊城下梅花初錦衣他日拜家慶人看相如駟馬車

琅琊書屋為石秀才賦

醉翁去來三百年琅琊山水仍依然林芳谷秀誰管領  
石家書屋僧廬偏主人讀書少諧俗文章往往追古賢  
山中風月足吟弄世上富貴從推遷連連岡阜擁簷牖  
鬱鬱竹樹畱風煙晴猿晝啼白雲下獨鶴夜叫長松巔  
冥搜得意或拊几感慨雙涕時淪漣悠悠寧逐蠹魚盡  
兀兀已覺筌蹄捐君不見玉屏峯南瑁湖上我家舊屋

臨清涓綠蘿搖春拂牕戶紙屏竹几清且便十年棲遲  
不謂好一日悵望空雲天終南少室非我有東華塵土  
勞鞍韉勸君及時須行樂豪傑未有終林泉

文武傳芳為李惟中郎中父壽

公家奕世龍韜學已會風雲取高爵百年海宇煙塵清  
又向雷門見頭角峨嵋劍閣橫金天西連草堂錦水邊  
雄豪秀潤各有得公獨於此當其全西風使節相如歸  
公呼諸孫候江湄遂開高堂稱壽卮錦衣前拜繡帽隨

熊羆鸛鷺各有姿邦人來觀嘖相語誰似公家文更武  
文謨廟堂武禦侮天佑公家後方鉅萬歲千秋奉明主

送蔣國器

西風一夕起平原到處羈人憶故園失路未須憐季子  
作書方擬賀參元功名入手無多事塵土留人豈足論  
記取他年說今日冷雲疎雨出都門

送湯同知督運

時張秋未塞南方大水開白茅塘以泄之

兗河秋水不容舳沽口回風積萬艘五服上供推袖領

九重深眷想賢勞君恩左右慙虛被民力東南亦孔騷  
眼底白茅連瓠子夕陽離思滿亭臯

水仙扇面

銀杯側西風羅襦不禁冷空江月落時想象孤鴻影

送曾執初知嘉定州

都亭楊柳秋來短獨采黃花映別觴五馬雙旌萬餘里  
西風隨處挹清香

九日招德卿抑之

小酌無勞折簡催  
自分花餌飮玫瑰  
只應免得淵明笑  
兩歲重陽不舉杯

題戴司寇所藏張翬小景四幅

岱岳東南日觀峯  
雞鳴遙見日輪紅  
仙家應說人間世  
銀箭金壺漏未終

一色滄波浩渺間  
人言此外有三山  
莫欺只尺生綃裏  
多少樓船去不還

老翬筆意師觀遠  
恠石長松氣凜然  
四十年來真蹟亂

夕陽紅樹滿山川

斗帳無風鐵硯冰  
梅花未要雪天晴  
坐來尚有關心處  
時復空山折竹聲

文華進講

閣試下同

鵠立朱衣正殿東  
爐煙飄動講帷風  
百年禮樂逢昌運  
乙夜勤勞仰聖躬  
毫末豈能裨海岳  
精誠直欲感蒼穹  
邠風無逸前王訓  
稽首鈞天意萬重

河渾渾

河渾渾發崑崙奔馳萬里出龍門出龍門齧金隄汎瓠  
子魚鼃蛟鼉乘時奮起城郭壞丘陵頽漢帝沉玉馬勞  
歌入雲哀河渾渾洵神靈我皇龍飛初泥沙潛伏波鏡  
澄皇欽事裡孔精胡為乎一日騁雄悍違天經奔騰蕩  
滴岸圻隄傾使行者不得遂居者不得寧園廬漂溺魚  
鼈橫河渾渾下民咨神禹上天去賈尉來何時三年青  
究民亦疲土牛捷石將恐非河渾渾側身南望勞我思  
夢中得四句如詠講筵事者

翠幕光中黼坐開  
觚稜初日照春臺  
絳函未啓中人捧  
玉輦纔臨正殿迴

樗老

為楊起同尊人賦

君不見麝憎臍雞惡尾又不見豹患皮象患齒  
蘇張戮辱韓白菹全神乃在支離子東吳楊翁太古民  
妙訣早受南華君盡將智巧付時輩甘與樗櫟同輪囷  
闔閭城西雲水闊南北舟航日闕噎春花秋月閉門看  
八十年來幾興滅泥龜曳尾寧詫神溝斷廟尊俱失真  
萬牛回



首歌孔栢少陵豈是知心人  
樗日老翁日健塵海桑田  
幾回變人道孫枝却不如前年  
選入明光殿

秦府紀善林介菴挽詩

五十飄然便挂冠  
向來城府掉頭看  
高蹤自與鴻飛杳  
短世頻驚蝶夢殘  
絮酒何年奠冥漠  
囊金他日記沈瀾  
嘗有以金寄君者  
歿後其子持書來  
乃不及元數君出而還之  
封識宛然  
哀歌不盡思賢意  
塵海風波正渺漫

送鄉僧

乾坤無物礙行蹤又送孤雲入九峯  
林鶴暗驚空外錫海鯨先報佛前鐘  
金衣拂曉承新露文室凝塵記舊封  
應識西來祖師意逢人莫浪演三宗

冬至朝賀

閣試

璿管灰飛宿靄消紫宸班動御香飄  
貔貅列仗開弓劍芝羽克廷雜珮貂  
長日光中瞻黼展卿雲影裏聽蕭韶  
願言聖德同陽長永從夔龍集治朝

東江家藏集卷六

欽定四庫全書

集部

東江家藏集卷八

詳校官監察御史<sub>臣</sub>龔駿文

中書<sub>臣</sub>劉源濟覆勘

總校官知縣<sub>臣</sub>繆琪

校對官編修<sub>臣</sub>周瓊

謄錄監生<sub>臣</sub>袁文宿

欽定四庫全書

東江家藏集卷七

中集三

明 顧清 撰

北游稿

詩九十八首

乙卯正月抑之以疾告歸蓋有為也作春雪歌

送之

昨夜西堂春夢好已向池邊覓芳草雪花日暮忽滿城

無乃天欲畱君行驚飛亂舞不自制黃雪冥冥直侵地  
公子城東醉未歸將軍塞上愁無寐此時念君當別離  
官河千里冰未澌僕夫宵裝待明發車輪凌兢馬蹄滑  
旗亭呼酒強勸君明朝望君越與秦丈夫結束自有地  
征途藥餌宜相親玉河東隄舊行路冒雪送君從此去  
無限幽懷不易論回首西垣萬銀樹

上苑聞鳩

閨試

春波溶溶宮柳低春雲漠漠斑鳩啼柳陰漸深看不見

時復數聲金殿西青繩輦路無塵土鳴鞘不來日亭午  
高樹低枝相應呼似惜田農望時雨農人望雨心如渴  
鳩啼日暮聲不歇乾明門前春氣深太液池頭煙水闊  
煙水微茫連別殿忽去還啼畫樓畔柳密花深不再聞  
時復宮壺墜銀箭憶昨至尊親勸農青旂黛耜臨春風  
一聲此日徹天耳碧霄幾見回重瞳八年海宇歌太平  
春田處處斑鳩聲綠秧刺波桑堪青却憶江南村落行

春雨

同上

麥苗侵壠黍含滋微雨東來似有期涼拂畫樓分迴野  
潤兼紅杏點清池豐穰竟愜三農望造化寧於一物私  
想得宸游同衆喜彩簾高捲看飛絲

首夏即事

同上

金獸香殘晝漏稀嫩槐庭院午風微蜜房分子蜂初靜  
書閣垂簾燕自飛小碾試茶催瀹鼎輕刀裁葛已成衣  
故園遙憶三江外梅豆青青筍過扉

內閣賞芍藥次韻二首

時閣老義興徐公洛陽  
劉公長沙李公徐劉首

倡長沙及學士篁  
墩程公以下皆和

層城紫閣對陰陰  
天與名花著意深  
素辦巧攢憐玉帶  
醉顏微暈側檀心  
一時勝賞誰當繼  
前輩流芳故許尋  
擬和陽春歌浩態  
斜陽步履幾沉吟

紫泥封後玉堂歸  
閤吏鈎簾午漏稀  
花事直於今爛漫  
賞心猶自惜芳菲  
官廚次第傳宮醞  
城日參差散錦帷  
不似維揚識金紫  
年來春色滿黃扉

午日即事



節物相催似轉蓬  
御筵仍見綵絲紅  
君王未押羣臣燕  
先酌蒲觴壽兩宮

白燕 已上皆閭試

海國年年傍社歸  
春來爭訝羽毛非  
不經乳穴移仙骨  
似剪齊紈作舞衣  
已化玉釵空悵望  
未消紅縷故依稀  
月明昨夜風簾動  
驚起還隨白練飛

桐隱為龔九成賦

鳳凰起丹穴不息  
凡木枝飛飛度中州  
正值軒虞時六

律既以諧九德被絃徽回瞻紫山岑青桐映朝曦醴泉  
漱其根祥飈扇萋蕤一斂赤霄羽永日共娛嬉由來千  
仞心豈有稻粱思黃鵠凌紫煙一往無還期雲鵬六月  
息荒忽經天池古來高尚徒不必皆潁箕終南隔人世  
達士供一嗤方寸有萬里何須裂冠綈九成有冠帶我  
歌桐隱篇想象卷阿詩君王富車馬遲爾看來儀

題扇送同年奚從之使海南

仙人乘槎南海去祖席燕市已分冰把贈金陵半輪月

為君隨處掃炎蒸

有草名鴈來紅者莖葉如雞冠而無花得霜紅  
甚俗呼老少年或畫以貽樗翁良德南夫因  
賦以為壽予亦繼作

涼風過林薄衆綠俱以萎嫣然叢葦間見此春花姿物  
變理趨朽化工豈其私老螳緣其顛顧盼如有思物情  
憐晚榮予亦懷安期因之發孤咏持玩惜芳時

送宗都運廷威之長蘆

我家東海居目擊嗟丁苦民勞莫如農衣食自王土輸  
官贏斗升小大得濡煦溟沙列萬竈勺合盡官府肩箱  
入連倉私鬻翦為虜燎薪與募直一一挂文簿商課或  
不充輸錢為市補緡鋸非天墜貿易復何所不應為法  
初乃爾自相悟公私兩煎迫稱貸日旁午窮年困炎歊  
肉盡繼肝膂坐令兼并徒旦暮收拾伍亭丁雨雪假貸  
晴而輸鹽有不  
出旬月而  
償倍利者微文牽積弊魚爛不可舉常思桑孔意寧料  
遽如許必逢忠愛士重為整機杼宗君滄州行倚任切

當寧北南雖殊風物久理同蠱執炎思冷風久亢覲霖  
雨便文止須臾垂名動千古予言未可窮君行念靡盬

送同年施亨父令固始

霄漢初分列宿光固陵回首是桐鄉驛程到日齊封盡  
鄉信回時郢樹蒼莫以官曹殊內外直須政事撫流亡  
老成人物經綸手遴選應無負廟堂

送沈良臣赴南雄守

南安舊俗思張守又喜南雄得使君五嶺封疆元不改

三吳人物並能文香凝畫閣晨聽事風捲朱旗曉看耘  
正使勲名照青簡未須違遠歎紅雲

南雄北界南安民以負擔為利數起爭焉張公汝  
弼守南安為正疆界而二邦之訟息故詩語及之

秋郊觀稼

閣試

金天高迴霜日晶原田靡靡黃雲平老農攜饁坐田首  
梨棗綴樹光晶熒兒童笑呼驅鳥雀落日村巷多歡聲  
我行按轡為助喜感歎欲去還徐行前年江南雨連月

百穀爛死秋無成去年山東仍苦旱滕尾兆圻橫庚庚  
室中啼呼道傍卧豈有束穗酬深耕今年豐稔信可樂  
却思舊日還心驚茫茫禹甸極四海安得是處皆豐盈  
君不見紫瑤草俱長物惟有豐年婦子寧

徐希曾母壽六十

天上春衣絢綵霞庭前慈竹間黃花仙家歲月看初遍  
聖主恩波未有涯青鏡自知雙鬢在玉梭曾度五更賒  
遙知孫子稱觴罷猶自從容問鹿車

嘉興蹇貳守六十得子

青雀東飛入海雲  
夢熊新兆協生申  
天將福盾怡眉壽  
人向箕裘卜世臣  
那用鉛砂還漢鼎  
直須花甲度莊椿  
無由共酌鴛湖渌  
一覩天家五色麟

貳守係少師忠靖公之後

題畫送李大尹

雲白天青映海山  
使君花縣白雲間  
山中老稚收成畢  
齊望雙鳧日下還



冶齋先生挽詩

獵獵紅旌動驛舟蕭蕭行李不禁秋鹽梅已缺蒼生望  
樗櫟虛慙藥籠收聖眷有隆餘卹典國謀誰與記先憂  
西風一掬羊曇淚東去遙添逝水流

挹泉

寒泉出幽谷上有長松林我行林谷間毛髮增蕭森脫  
纓不忍濯竟日臨清深深堪娛嬉感彼潢汙池當其  
在山時泓澄亦如斯皓質本易涅素心亦難持誰能幽

谷裏相對弄珠璣

城南別墅

夢裏南徐漏未殘  
角巾回首便商顏  
傍村花竹多侵市  
背郭亭臺遠見山  
身世百年雲變盡  
功名千古鳥飛還  
尋常諸杜頻來往  
賭酒敲詩亦未閒

送方與義赴資陽得讀字丙辰齋居作

陽精行天明四目  
孽狐潛形狡兔伏  
太微郎位發光潤  
萬里炎荒起遷逐

與義以給事中  
貶雲南某驛丞

平生未識晉鄙陽  
解

近幸餞忠州陸男兒有身許家國風波雨雲隨反覆資  
陽雖遠實壯縣次第皇恩此牽復古來直躬多坎坷畢  
竟綱常係吾屬眼前瑣細猶不棄如君豈合長碌碌天  
衢崢嶸歲華盡車輪宵脂馬晨粟峨嵋西南望松桂已  
覺春陽動幽谷從來自許百鍊鋼此去人看九秋菊微  
之一折輕自壞元城百挫無轉足兩公遺事炳丹青牙  
籤時整西風讀

齋居和同館曹良金刑部韻

華月分光映列躔白雲元共紫微連  
爐熏茗盃還今夕  
閣試堂書又隔年功業要看歸宿地  
賡酬不礙往來篇  
欲驅蹇劣追神駿撥盡寒灰午夜前

送殷通判之嚴州

三百危灘走急流萬重山色護嚴州  
人家樹裏開圖畫  
驛吏花間候綵舟駿足豈應今日展  
高名合向晚年收  
子陵祠廟雲霞上為想春風露冕游

烏木扇歌

南蕃烏查烏角光剡溪溪藤色比霜兩物迢迢天一方  
阿誰妙手巧裁量坐令皎月生筐箱金花點綴七寶裝  
牙簫鈿鑷回光芒為君鼓舞生清涼回思故國雲茫茫  
枯蔓朽株紛路傍人生貴賤豈有常犧尊溝斷同根芳  
君不見金門六月清暑殿猶堪舒卷奉君王

陪李子陽吳克溫二太史杭世卿吏部游城東  
潘氏園賦得流水

玉泉山前看濫觴鳬鷖翔集菰蒲香遠波明滅帶城闕

別派宛轉通林塘褰衣經涉孺子喜展席俯視塵襟涼  
斜陽上馬傍隄去極目東流思故鄉

游香山

幾年塵裏說登山涉磴穿林路幾盤碧樹樓臺深見寺

紅雲城闕遠平闌廊僧揖客多鄉語

主僧暄東白嘉定人其徒多鄉曲也

春菜登盤稱野餐斜日催人強歸去欲從羸馬謝朝冠

送李原復之南京刑部

水雲亭上坐論詩眼見紅芳落酒卮好景一番連孟夏

故人相繼作分司風波道路君應識冰蘖心懷我舊知  
兩字哀矜一尊酒臨歧不唱渭城詞

原復與黃天章名第皆不當南選

升彼高堂為毛太安人壽

升彼高堂酌其兕觥兕觥欣欣春酒載盈維彼碩人是  
介是承碩人雍雍厥德洵美載其有家維惠恭止維惠  
恭止休其承祉其祉伊何蘭茁其芽處也家寶出維國  
華國華有輝維帝寵嘉錫之鸞書曰汝之報汝考汝母  
汝迪汝教維往莫追生也永耀碩人拜命弗掖弗持珠

翟霞裳象服孔宜邦人來觀秩秩其儀其儀秩秩其容  
有憚乃筵斯堂乃几斯席碩人燕胥籩豆有繹維南有  
山維東有海碩人壽考終燕樂豈山石弗礪海波弗塵  
維彼碩人於千百春

雙桂堂為宜興張世麟世鳳賦

美人出南國文采並嫺都風雲一朝會聯步起天衢伯  
也空冀北叔兮照三吳何異同根桂分庭各數腴春風  
會京邑閭里增歡娛聯芳世所羨況此一歲俱我我雙



桂堂麗榜輝新圖清芬既不異茂幹宜相扶昔聞雲間  
陸亦有眉山蘇往跡炳如在師賢在吾徒皇風發雅奏  
金石間笙竽願附棠華詠千秋揚令樞

題竹

懸石嵌青空下臨湘江水中宵明月來照見青鸞尾

送王敬止使朝鮮

大人值興運避地開東藩八條一以施禮俗儀中原燕  
滿中擾亂淳風久仍存流傳扶餘慈至性天所惇真德

頌唐運金石振清溫至今雲海上想象扶桑暎皇帝膺  
寶歷威德被魚豚維東實首順珪組繼脰膾赴告謹終  
始寵數亦殷繁皇皇使者車中天下旂幡共瞻天人姿  
照耀東海垠宇宙有大界中華有常尊奉使固有體專  
對非徒言春風海山道注目盼回軒

送李太史希賢提學浙江

吳越連雲海蓬瀛切斗樞皇仁無內外憲府敕文儒左  
掖天低戶西清月在隅法冠初著豸文筆近提朱

太史  
近同

考春

甄別推明鑑陶鎔屬大鑪化源深滌溉皇路儼馳

驅帖括經言病雕鐫士習殊洗心端有待簡命的非徒  
列屋思明燭停雲悵據梧真淳欽雅度灑落見長圖梁  
棟時方重昌苓世並須未應嗟遠別回首是清都

送楊邃菴提學陝西

海內聲華四十春向來江漢夢猶新門牆愧不參諸子  
祖席何期列從賓東壁二星終近斗南徐一水又通秦  
平生萬里真無負到處青雲滿後塵

送沈雲松還上海

進士仁甫之父

已覺人間萬事全鍾情猶為別離牽但令消息年年好  
即是斑衣舞膝前

送沈明本教泰順

欲別無言意萬重扁舟望望過江東名場自昔有遺恨  
學海幾年成此翁人向中朝愧山簡天教南士識胡公  
雲門鴈蕩經行處為想肩輿入畫中

送沈鳴岐教壽昌

七里灘頭倚短篷  
錦雲峯裏坐春風  
舊來鶯鶯文猶炳  
老去驂驪氣尚雄  
人世幾番雲作雨  
功名千古鳥飛空  
何當共酌桐江水  
一洗從前鄙吝胸

送李子陽先生歸省

朝下西清月未沉  
東門冠蓋簇儒林  
湖山夢裏三年別  
風雨秋前一夜心  
後閣承歡青鳥集  
前星回望綵雲深  
潘家林外春陰在  
還許追陪繼賞音

送王伯安下第還餘姚

五色光中炫早曦  
丹山秋日鳳南飛  
常疑勁翮冲霄慣  
未信中原結網稀  
吳越天連雙闕迴  
蓬萊雲近一星輝  
杏花江上春如海  
莫待西風吹綠衣

題莆田郭氏世美卷

鄧侯傳國魏謩封七葉  
貂蟬四世公  
我賦郭家三孝子  
萬年人紀列清風

壺山蒼翠入閩天  
曾見參軍哭墓年  
生死靖康南北路  
可知當日事昭然



卷七  
一家純孝祖孫同狂卒何知亦歛戎看取弟兄爭死日  
古人何必是褒融

一命初霑竟力辭清漳心事鬼神知平生不慣談茫昧  
欲與先生賦瑞芝

恒齋為體齋宗伯弟曰謙賦

浮雲天地倦西東一語南人契始終自古良醫比良相  
傳家正爾不須同

粉署微垣列弟兄青囊畱我萬山行年來悟得雷風象

不向人間取近名

送石訓導之臨湘

允升御史之兄

令弟清臺著繡衣一氈還與鄭虔宜過湘不用輕為賦  
聖代崇儒正此時

天岳山前倚短篷目窮飛鳥沒晴空平生萬里江湖念  
都付春風化雨中

送華文光尊甫南歸

數行官柳帶城斜又送龐公上小車天上神駒方獨步



卷七  
江南喬木幾名家山當朔野霜先結水遶官河路不差  
聞道家君北來近相逢何處整烏紗

送郭魯瞻知山陰為礪齋太史作

我家簡子山陰日清晝垂簾一事無遺俗未應忘舊老  
好官須自出吾儒青春日月當周道黃甲風雲入壯圖  
別有故人簪彩筆金鰲峯頂候雙鳧

壽羅子文父得鍾山芝

龍蟠山下鬱青蔥紫蓋分明五葉通靈秀獨鍾麟趾地

壽昌多應鶴髯翁歌傳漢府空聞調食著仙經是有功  
擬掇芳腴薦清醕夜深飛夢繞江東

楊啓祥金蘭

煮膠和金金作泥擣藍染楮光研脂楊郎醉把離騷詞  
幽意已在沅湘湄須臾光風蕩朝曦林隈水曲皆春姿  
叢石卧羊低竹枝紫莖綠葉芳菲菲佳人遠游春不歸  
靡蕪綠滿孤帆遲愁來罷琴撫瑤徽臨圖更覺同心稀  
願采芳香遙寄之江湖闊遠波浪危空梁落月渺予思

送蘇伯誠太史提學江西

鬱孤臺下駐旌旄  
立諸生擁繡袍  
新命北來天語重  
故鄉南望嶺雲高  
歐陽舊俗堯藩冠  
許國遺宗漢署豪  
有待一番時雨遍  
歸來東觀理風騷

堵氏母七十

紈布蕭然古孟光  
向來閨閫意何長  
不將本分矜流俗  
力辭旌表直以孤貞代義方  
年與日添頻把酒  
心隨蘭死只留香  
良人地下應含笑  
青鬢於今淺帶霜

重送劉文瑞有懷顧頤弘先生

先生先以書勸文瑞就官未至

而文瑞去及是始行其說而先生下世矣

太息頤翁不可招，離亭東望客心勞。  
貽書恨不當時早，歸興何如此日高。  
塵世百年終劇戲，溪山隨處足游遨。  
只應未及君家祖，爛醉春風擁二豪。

予餞文瑞以中酒不能赴故云

嚴以德送女至，畱半月歸賦長句為別。

我弟之婦君家甥，君女還作吾兒婦。  
天然兩姓若蘿葛，不獨朱陳誇世舊。  
憶昨與君初結言，望松樓下開賓筵。

友松老人執盃酒千金一諾須臾邊

壬子四月十二日友松生辰也

微

官繫人不能去五載停雲渺江樹向平心事兩自知山  
閣水遙關百慮西風魚鴈交梭馳君來不來使我疑不  
知今夕是何夕把酒却送君南歸君來官河尚舟楫君  
歸河梁積冰雪故人分手自不堪况復鍾情初遠別鍾  
情遠別不須嗟兒今有室女有家官道附書如驛置春  
江放櫂若仙槎人情得隴還望蜀我已安排洗孫局明  
年此日待君來玉果犀錢遍童僕

題雪竹送陳生歸吳

虎丘山下雪晴時  
拄杖敲門自一奇  
京邑歸來看圖畫  
春盤玉版鬪青絲

崔民瞻郎中父母同壽

萬里晴空倦鳥歸  
祝融峯下舊柴扉  
手栽堂樹皆堪芘  
坐對雲山已息機  
長日溪鮮堪入饌  
新年宮錦又添衣  
孟光同德還同歲  
何止人間七十稀

送趙悅梅

丙辰九月先家  
君至茲復先歸

北來行李報家君歸櫂還迎潞渚春兩歲風光動梅柳  
一時冠蓋集荀陳無窮淥蟻尊中滿有約青山夢裏頻  
長向西風聽佳信阿戎官况只清貧

戊寅四月廿八日錄至此歎息久之時天常歿矣  
保定趙守濬河築橋詩為傳北潭太史作

鬱鬱平阡帶古壕沈沈新綠卧虹腰潯沱不復思王霸  
漆洧何煩濟國僑千里桑麻分雨露一時粉繪雜風謡  
他年三輔收遺事應續黃圖第幾條

題孫良輔所藏小景四幅

野桃山杏各乘春  
多事劉郎為愴神  
六百年來只如此  
一番花老一番新

壇杏無花到水蓮  
中間遼闊二千年  
牕前風月湖邊景  
只恐丹青未易傳

欲出未出峯頂月  
將棲不棲林杪禽  
曾踏長安軟紅土  
方識幽人此夜心

舊識襄陽孟浩然  
蹇驢衝雪據吟鞍  
老來自怯溪橋滑



便作林逋一樣看

送周先生出守嘉興

名東字伯震予會試本房初考官也

雪後燕山畫不如東華晴旭散朝車黃迷禁柳辭龍仗  
紅逗江花引隼旗西浙幾年憂困弊南宮當日記吹噓  
丈夫五馬尋常事泚筆勲名俟特書

季本清給事父母雙壽

畫簾花暖春雲香金尊酒滿蒲萄光玉童雙歌按清商  
門前珠履來成行鳳生三雛一雛翔凌厯紫清棲柏梁

兩雛膝下斑衣裳春風對舞送霞觴  
山中之暉煉鉛霜  
潔身獨立遺天常  
搞項黃馘同枯桑  
人生七十齊高堂  
腰有綠綬懷銀章  
俯仰無愧終康強  
滑甘滫瀡供時嘗  
三山弱水是何方

蔣監事濟民出主靖安簿蓋不得於其長也為  
題其秋塘白鷺圖送之

曾逐青雲上繡衣  
龍墀晴日颺朝暉  
天風不礙江湖迹  
還向秋塘自在飛

題毛維勤所藏禹門三躍圖

一夕風雷動九重  
春江回首萬鰲鰐  
雲泥只尺從人辨  
諸葛南陽本是龍

題陳克明竹

日永湖山檜影斜  
微風時墮紫藤花  
道人無限江南意  
更寫篋簞向客誇

予時寓趙氏東齋  
齋後古檜一株其下累石為小  
山藤蔓籠之殊有幽趣  
克明寫竹於此皆實景也

近為俗人所有撤而新之無復遺跡矣

送趙明嗣襲職之金陵

錦衣將軍燕薊郎面圍紅玉顏清揚全家舊住雙闕旁  
一門諸父皆周行阿翁昔日事先皇金戈日侍殿東廂  
一日不見回清光將軍後出亦堂堂韜鈴間續詩書香  
十三學書臨硬黃十五百步穿垂楊二十辭家宦南國  
已覺萬里前無當聖人南面馭八荒風塵不動塞草長  
將軍功業何所見可惜龍劒明秋霜龍劒明霜龍不如蓮

花鑿鏤金蟠拏但令不試慎勿疎君不見金張之子世  
宿衛江東雖好豈是將軍居

夢作朝退步至南亭詩有步入南亭路不難落  
花紅襯紫苔斑之句感而有作

一自看花入上林溪山長是夢中尋不知誰闢南亭路  
又向朝回發短吟

出郭

出郭頻瞻尺五天雨餘雲物更清妍樓高紫鳳中天見

山躍青龍到海旋，香徑細尋芳草入酒帘。  
低傍綠楊懸微官，自笑成何事，閒過東風又一年。

好景城南四月天，遊人容冶百花妍。  
紅驚小輦流鶯起，綠襯陽坡細馬旋。  
風裏游絲晴自裊，雨餘新月晚初懸。  
春光容易空拋却，頻倒芳樽莫問年。

閻太守復任西安

好去西安守，還乘五馬車。  
封疆參井舊，民物漢唐餘。  
會府人咸喜，銓曹最已書。  
兒童候公久，歸駕莫紆徐。

王舍人孟端為華處士作耕漁圖久而失去其  
孫琯訪求得之

舍人善竹兼善畫源流本是湖州派湖州之畫掩以竹  
舍人妙思紬不足耕漁之圖誰所傳華家明珠海上還  
家聲不愧見父祖元氣有託畱人間川原靡靡高復低  
東村網罟西村犁長鞭驅烟入深樹小艇載雨歸前溪谿  
魚正肥春酒熟百斛新輸官廩粟酒酣月出歌一聲何  
處高門有華屋浮生不逮斯人早前輩風流迹如掃銀

鉤金錯發天機何幸典刑猶此老舍人寸紙時共珍華  
郎見圖如見親乾坤無窮百年速撫訶安得煩鬼神君  
不見平泉樹石散諸貴此子此孫今幾人

蕭升榮母曾孺人挽詩

堂北霜風緊天涯客夢催

升榮出使有惡夢已而訃至

猶看衣線在

不及詰鸞回遺德良人感新銘閣老裁前山松栢迴猿  
鶴助悲哀

氛沴交行日鄉鄰出次時情惟舅姑重義不死生移執



禮神應鑒憐孤族並推小郎今長大衰杖有餘悲

聞蛙

入秋足霖雨頗長南池淥鳴蛙欣所遇日夕鼓其族喧  
喧未渠已隱隱撼吾屋羣和雜蛄蚓間噪警鶯鶯已驚

西堂夢復亂城南讀孔公乃紀實

聒耳

周生斯矯俗

兩部鼓吹

鼓吹本吾厭矧茲強稱目鹽調恧肱熊灰洒念燔鞠顧  
茲繁有徒一一勝掩撲維天運四時萬品均化育妍媸  
與細大賦受咸自足春陽鳴鷓鴣寒雨悲蛩蠋時至理

則然天機詎能伏可憎諒多在君意偶斯屬不見薨與  
蛇無聲日哀毒

亞聖嗣孫翰林五經博士元蒙恩贈封父母

尼丘降神聖鴻化流無疆三遷毓明德重光麗秋陽周  
轍竟不西斯賢復遑遑坐令百代下掩卷悲齊梁博士

幾葉孫逢時邁虞唐通籍聯禁從鳴玉司烝嘗

顏孟二  
博士皆

世襲奉祠入  
朝立常班

仍於報功典再衍酬恩章煌煌紫鸞書照

耀東山傍逝者不可作萱枝獨芬芳永懷五鼎意先後

同悲涼予亦章甫士詩書沐餘光顧茲盛明典何以稱  
褒揚共惟神明胄允矣萬夫望惟聖始孝弟惟皇眷忠  
良懷哉復何言爾祖訓有常

壽少師謙齋先生七十

太微無雲星漢明商飈按節回玉衡土階六葉飛堯蓂  
歲在戊申申甫生甲戌仲舒楊大庭引翼房杜登蓬瀛  
金鐘玉律諧頌聲聖人龍潛資六經綳麻日侍龍樓清  
有時石室繙金縢甲子周歲龍飛騰白麻首出金甌名

司馬入府羶裘驚十年海宇歌太平如臯如夔連茹征  
鸞鵠濟濟充皇局并包細大靡矜爭香山日夕思舊盟  
帝恩非常歸未能黃扉日晏下紫清壽觴百斛分金莖  
誰歟壽者公與卿次者乃是鑾坡英天佑我皇惟純精  
鍾靈毓秀歸老成往昔宵寐通精靈先知已屬范高平  
麟袍五色腰玉橫巍然百辟瞻儀刑氓飢欲粟寒欲繒  
公無言歸勞聖情年年此辰稱兕觥

送毛彥伯

憲清太史之兄時來省  
母乃祖間翁壽九十六

議論相逢便偉然省華諸子固多賢風雲幸接鴻飛後  
鄉國仍看樾蔭連兩月客程還膝下幾宵歸夢又江邊  
春衣好作重雲錦令祖新秋又八千

送李師文令將樂

建業秋風歌鹿鳴同時龍李最知名一籌已惜三年後  
百里猶煩匹馬行星出紫垣南去迴水經閩嶺北來清  
餘杭令尹新祠廟香火於今更有情

愛鶴為海虞曹舜祥賦

青田雙白鶴脫略塵凡姿東海有逸民心賞同幽奇天  
質不自媚野情諒難羈逍遙雲海間永與雞羣辭鶴也  
誠可人愛鶴人可知人有異於鶴賈鞭眩黃梔駁尋不  
自覺淪沒共汚緇君子擬鸞鳳儉士乃鴉鵂我歌愛鶴  
篇繼彼乘軒詞

米元暉小景一幅淺色積成高五六寸長不二  
尺而渺然有千里之勢為賦六言

芳樹春酣雨後薄雲橫帶山腰極目青縈白繚江南何

金定四庫全書  
卷七  
處迢迢

樗老楊翁挽詩

昔年同館士頻歲泣霜風又接樗翁計其如洛社空行  
身漢陰叟避世鹿門翁漸覺滄洲遠烟波日夜東

道為無心得才因不用金子看青瑣貴身到白頭年太  
史春秋志中台琬琰鐫新墳才四尺佳氣日蒼然

海鴈依時到庭花不再紅

嘗題鴈來紅圖為翁壽

通家錦囊在入

室總帷空歌哭同杯酒

計至前一日同館會起同宅

江湖想釣簞真

淳那復見落日起悲風

厲處士挽詩

末路嗟何似江湖見此奇能於外物薄不逆故人欺淳  
孝真堪傳餘言盡可師九原逢德耀無愧白頭詞

九日衛景玉西莊賦

前年重陽燕城南去年重陽小山前今年重陽西郭下  
青山碧樹開芳筵前年坐客黃與李

天章原復

去年去作南

曹吏今年坐客羅八九一半相看非舊歲不才獲落無



所施三年坐食尻生胝主人愛客我不去年年對舉黃  
花卮西清步出長安道一帶青山遠相撩霜風拂衣聲  
撼撼寒日映帽光杲杲入門下馬耳已清劉東胡琴薛  
鸞箏新聲共愛白翎雀浮雲不動黃龍城黃龍古城秋  
草裏狐狸鑽穴荆棘橫石家郎君從失足四百餘載胡  
風腥西風慷慨對斜日只此便合傾千觥主人有酒客  
無庸辭千古在前後亦如斯中間可樂其與幾時謂君  
不信上高處燕丹郭隗冢累累

記是日會者陸太僕獻臣唐進士士綱喬司訓時  
章張鍊師永新陸喬張皆下世原復亦卒於雲南  
而予所居小山軒今易主者三矣人生豈足恃哉

十日南山宅尊鄉會分得東字

搖落龍山夕照空衣冠高會鳳城東從渠海內風流盛  
輸我尊前笑語同幾處黃花如故里他年綠野感秋蓬  
晚來白髮顏中坐欲改南山號醉翁

題史引之所藏長江六月圖

長松泠泠生晝寒高巖側綴青琅玕陽坡宛轉行朱闌  
青莎滑膩碧蘚斑紅橋直走淩驚湍下接孤嶼高巔岼  
隔江青山如伏獬柴扉草堂相對安漁舟縹緲青林端  
樵童牧叟時往還羣山忽斷百里寬青蒲綠藻縈微瀾  
臨江飛閣叢井幹江流石角隨彎環前山轉深勢未殘  
層崖複磴勞躋攀上方寂寞空禪關平林演迤臨江干  
江迴山盡路險艱飛梁側卧波潺潺江流自此入渺漫  
遙山一抹天際看東京畫史真高閒

評者謂趙  
千里筆

故將山

水窮瓌觀岷峨嘉陵遠草殫九華落星揚子灣晴洲歷  
歷被芳蘭美人不來空浩歎疾風吹塵暗燕山金星龍  
尾冰攢攢燔熊熾豹光赫殷為君炙兔掃冰紈君歸終  
日山水間肯憶羸馬隨朝班

十月四日同韓國器中書張時行吉士餞劉御  
史文煥還赴尊鄉會於陸太僕第得夕字

東城送客罷觚稜動暝色尊鄉奉嚴戒後至有明謫揮  
鞭不返顧望望淩紫陌同行韓與張先後互驅策我馬

才本下此日殊努力及門見僮騎相顧如有得主人聞  
客來索帶命殺炙衆賓已沾醉為我還促席勸酬略登  
降問勞雜諧劇寫情會有賦探韻止餘夕飛觴不假借  
閣筆岸予幘清時自難遇勝會固鮮襲今晨復何晨爛  
漫挹珠珀矧茲鄉鄰聚更覺情景適南斟出珍藏北饌  
割鮮碩雖微霜橙薦時菊尚可摘寒更近尤長城析時  
漫擊華鐙藹餘輝落月沉壞壁歡悰不可竟明發會有  
役據鞍謝主人璇標已東北

十一月朔張南山壽日

一自登名立從班周旋長在五雲間官階四品中兼外

公以山東參議直文華殿

書法三吳柳繼顏退食有時乘褐馬趨朝

滿目是青山

公家玉河東出門見山與褐馬皆紀實也

蓬臺此日羣仙會風

雪猶應許扣關

送袁良輔還封丘

聞道雙鳬曉欲飛錦箋紅燭夜裁詩月明古寺嗟人遠

良輔寓永光寺

寒壓重裘覺歲馳卓令至今佳傳在山公休道

薦書遲黃金臺下西南路眼見青驄入奏時

董虞臣辰溪八景為賦其二

雲根一片壓中流曾是仙人玉斧修絕岸巧通平野去  
細波長共遠山浮苔紋想象空飛鳥樹影參差壑駕舟  
借問碧闌容點筆凌風我欲試清游

右石橋仙跡

桃花不記武陵源峒裏人間別有天罨畫溪山明白晝  
接雲禾黍自豐年前岡飲犢逢巢父別浦移舟渡輞川  
問著主人無一事久拋金甲事春田

右猛峒新莊

錢思考挽詩

芳草春深滿綠園王孫歸去已消魂

常熟錢氏皆祖武肅王

人懷

故國流風遠堂有旌書節孝存遼鶴何年返華表楚歌

當日怨修門惟應黃泗源頭水流得餘波到子孫

君嘗沒此

水土人德之

冬至感懷

浮世侵尋四十將勞生何以稱冠裳回思丁未看辛丑  
別有愁根更是長



成化丁未有讀辛丑冬至感事詩一絕是歲十一月十九日冬至明燭候朝追感舊事為之淒然因檢故稿續書此於後蓋自辛丑至今十有七年時屢變而事隨以生憂卒未免而更長也不知更後十年又當何如耳是日午未間大風塵霾漲天

東江家藏集卷七